

### Wie Schidyngen von den Sachsen gewonnen wart.

In das heer reit der Sachse unde sagitte seynem hauptmanne was her von dem Doryngen gehort unde vornomen hatte, unde om gesagit bey dem eide. die Sachsen gyngen do den abent zu sampne unde wosten nicht was sie zu diensem gescheftenisse thun sulden. eyn teil ryten das sie abe zihn wolden yn der nacht unde flihen, die andern sprachen, sie wolden yn des koniges radt dorumbe senden. Do was eyn alt ritter under on der hiefs Hagk, des geslechte noch yn dem lande zu Doryngen gesessen ist an dem Hartze unde sie heissen die Hagken, der erwuschte eyn bannyr do her zu gehorte unde sprach „Nu horit, ir allerbesten Sachsen, ich habe gelebit manch jar unde byn zu diensem aldir komen, das ich nu ynn manchem gescheftenisse gewest byn unde nye gesach, das meyne frunde die Sachsen flohen. wer do flihen wil der mag is thun, abir kann ich ane flucht nicht lenger geleben, Iso ist mir das vil susser das ich sterbe mit meynen frunden. Eyn bilde neme ich von den toten lichnamen meynen frunde unde lieben gesellen, die itzunt hie umb uns ligen, die lieber hüte yn dem streite sterben wolden, denn sie flohin. unde was magk ich uch mit langen teidingen vormanen: sehit unde mercket, wir gehin nu sicher unfer viende zu töten ane streiten, wenn die weile das on yn der stat der frede geloubet ist, Iso synt sie sichir gemacht unde vorsehn sich keynes obels unde synt ouch sere von dem streite, den sie hewte hatten mit uns gehalden, müde geworden unde bleyben hynt unbesorgit, ane furchte unde ane wache. Dorumbe Iso vallen wir hynt obir sie, wenn ir slaff aller herteste ist unde aller susst. volgit mir: ich wil uch meyn haupt gebin, komet is nicht als ich uch gesagit habe. Nu efsit eyn wenigk unde bereitet uch mit allen dingen, wenn ich uch eyn zeichen gebe, das uwir leitern bereit mit uch synt.“

### Wie konig Yrmenfridt erslagen wart.

Ritter Hagk der gap seynen frunden eyn zeichen yn dem ersten slaffe, unde qwomen stillingen zu der stat unde stegen ungemeldit obir die wechter unde qwomen yn die stat unde rieffen ir keyner mit grossem gedone. unde die lewte yn der stat die erwachten unde erschrocken das sie nicht wusten was sie thun sulden. etzliche die behilden sich,<sup>1)</sup> etzliche die lieffen uff die galsen, etzliche vilen obir die muwern, etzliche die liefen under die Sachsen unde meyneteten is weren yre frunde. do

<sup>1)</sup> verbargen sich.